

傳狀類士雄公房

士雄公傳

公諱士雄字飛仙號白雲居士洪州守許虔公之行三子有宿慧根器不凡雅尚元默隸宦籍不樂仕進晚尤好道鄙章句煉長生訣挈家結茅於湖源之西山更號西山真人日誦黃庭內外篇有道術能咒龍作雲雨湖源峯頂東西南北有四龍井值歲旱公輒禱之屢應龍亦先後飛去井遂涸僅遺一井有泉潏然歲偶旱人咸強公效前事公曰此老龍也留之以賢山僧汲水供佛至今居民近湖源西山者皆以神道事之其嗣公戒積金鉅萬以資自豪能興水利鑿千工塘萬工塘迄今藍韶坪田之高岸者多利賴之其遺裔多散處長郡沿及本朝詩書繼世猶能以科第接武簪纓信乎明德之後自有達人也明洪武四年知平江縣事交河劉順撰

能謙公傳

公諱能謙字受益號牧齋西山士雄公七代孫元至正四年由平江梓岡里復遷湖源之西山後遷長沙明道都之堵門塘公性仁厚蓄道德而能文章值亂離以隱節高卒於洪武六年癸丑歲夫婦并葬本都戴家坪之桂花園爲分遷長沙之始祖嗣子一諱成龍遭元末之亂卒於善化李陵坡葬陶公祠左側傳本舊譜

道立公傳

公諱道立字煌建號主齋西山公十代孫能謙公曾孫也負偉望博學多材明憲宗成化六年領鄉薦孝宗三年簡授貴州麻哈州知州土酋順化大司馬文升馬公以循吏薦授都勻府知府有惠政吏畏民懷卒於任扶輿歸里葬長沙瀉化都冷家方嗣子三一諱可法次可任次可則俱列龔序遊太學咸負文望其後裔多散處堵門塘河塘橋白沙河橋口等處傳

本舊譜

可任公傳

公諱可任字良才號重菴能謙公元孫道立公行次子明正德間以國學選授國子監助教公器宇軒昂讀書識大體不倚權勢後請假歸田未竟其用以詩書琴棋娛老焉正德十二年丁丑歲夫婦並葬黃土埧之蛇形山傳本舊譜

貴梅公傳

人欲登之國史難矣卽欲傳之家乘令非有所持循不肯隨俗波靡爲其子孫雖擬鋪張揚厲而撈管者不免將言而囁嚅吾族貴梅字鼎和號南軒公則有可述者公爲雄公二十代孫諱賢勝字紹周號時齋公之冢君賦質敏捷沉靜枕經藉史手不停披每下筆不襲陳言人詫其標新領異屢應試不售教館數十載出其門下者多有所成見片紙隻字急起而拾

之焚灰送至江河逮老仍與詩書筆墨爲緣淑配黃孺人溫恭慈惠內助無虧舉子四公嘗訓飭毋存欺誑心毋作奇邪事至於窮達惟聽之於天嗚呼公享年八十有六自非讀書有得閱世既深烏能若此遇難阨而志則超哉在後嗣體厥志以修行乃足慰其靈爽予爲紀其行畧又何取乎溢詞族弟拔貢生尊樓貴濂炯奎甫謹撰

國慈公傳

向公德葺諱國慈字民懷同邑鄉先生也爲予家姑祖母壻時予方就外傳未獲親其言論丰采逮後與令嗣孔贊訂交具道先生行事予謹誌之不忘且檢其乾隆己酉歲公修族譜以示予見夫源遠流長根深葉茂知先生十二代祖能謙公由平徙長繼督修家乘先生獨爲雄房領袖於此見公族之人材蔚起卽先生尊祖敬宗之意允堪貽裕後人迄於今先生往矣而父老之訓迪猶盛稱先生懿範以作子弟楷模謂其立身也約而

謙其待人也公而恕其治家也和而嚴兼之通經史工文字膾炙人口不
衰惜乎齋志以沒然積厚流光久而彌耀今其嗣克恢先緒玉樹瓊枝亭
亭人望是皆先生培養醇茂可以垂於無窮也茲因其宗譜續修孔贊就
予請傳爰輯所見聞以彰先生實行焉嘉慶戊寅恩科舉人道光丙戌大
挑教諭表內姪謝樹藩拜撰

傳狀類 士淵公房外篇

士淵公傳

勅授文林郎向公諱士淵字學海一號淵躍徙居湘陰之南陂卽號南陂居士其先由河南開封隨其父守洪州兼佐從兄潭州安撫公幕府有才幹凡奏章軍機庶務悉資之後尊人卒於官從兄安撫公罷於讒仕途多蹇擇地偕逃公與其兄士衡士龍士雄扶輿南來隱於岳屬平江之梓岡里因見湘平接壤水深土厚人物清秀衡與龍雄留於平公獨卜湘之鄉於平者居焉以田以宅以長子孫公於此蓋長願作山中宰相矣而乃嗣公勝亦以教授終迄今隸湘土者二百餘年農桑之外尙能以詩書世其家於吾邑已哀然自成一族公之流澤何無窮耶吉輿公遺裔爲世好蓋嘗過南陂考碑碣質諸父老之流傳猶令人穆然想公貽謀之善而卜畢

萬之必大也已明太子少保工部尙書同邑夏元吉撰

朝佐公傳

嘗思國之忠臣家之孝子天下之義士其事雖殊而理則一蓋未可以輕言者如我朝佐公字方白乃淵公十五世孫仰雲公之三子生性聰敏學養深沉識見高明克全孝義竊聞公於父卜葬金盆架時堪輿云不利三房諸兄弟皆止念惟公一人不然且曰衛士之言何足深信縱或有之吾爲人弟爲人兄兄弟之子猶吾子也遂扶柩先登以安葬之越數月髮配魯孺人無子以疾卒繼配馮孺人未逾年而公歿吁公誠不計一己利害之私而安父於萬古無患之所其孝義爲何如哉姪孫重佑立碑墓表乾隆丁未歲叙譜附註小贊後奉公神主入祠以配血食並有設主於家朝夕奉祀則公暨德配魯馮兩孺人爲有傳人矣茲因續修家乘叙及於公四房子孫咸爲慟悼爰是含淚染翰述其梗概以垂不朽云四大房玄姪

孫貴琳貴爵貴道國和同識

朝義公傳

公諱朝義字楚隱明崇禎時人雖未獲親炙其儀型而觀其於近地馬家衝建法華庵捐香田召僧供佛知公爲樂善好施之人也德配陳孺人淑慎流芳咸欽闔則生子三長廷標字彩先候補州縣左堂次廷榜字名先三廷松字宗夏邑庠生公之曾元若凌雲由廩貢官教授詩書繼起代不乏人由是觀之知公又爲詩書食報之人也況孫枝繁衍世居南陂宅爾宅畋爾田其所由來固昭昭可考他如虎形聚廬而處爲志周公之長房三房牛埠山大荆街胡家衝分門各戶爲志周公之四房至若孔昭公之子孫或居黃泥坵或居大禾衝或居牛埠山繼繼繩繩元元本本有以光大其門閭乾隆己丑合建孝友祠於毛家堂置祀田一石有零每年春秋奉祀夫豈非公之積厚流光之所致與茲當續修家乘公裔囑予立傳

爰誌其巔末如此族之姪孫邑廩生潤庭貴墮芳溥氏謹撰

煌耳公諱朝聽如意舟記

嘗聞天下至美之觀莫如山水之爲甚也然山水之美非其人不
出非其人不傳余祖敏中公執政於宋後支分士淵公遷白果南陂居焉宅之前
有山上有疎林斷崖下有澄清深水喬木鬱蔥綠陰交蔭紅塵不到清氣
逼人態度萬千前祖役志於功名皆不暇顧余重有感於斯而嘆曰天下
佳山秀水皆得博高人遊何獨此所寂然任廢於是製一葉之舟於其間
舟成題其名曰如意余方獨坐舟中環顧舟之上下左右突有過客莫知
姓名昂然登舟揖予而告曰予爲此而取樂乎曾不聞流連荒亡之戒耶
子以此爲勝境耶曾不見華嶽泰岱洞庭黃鶴赤壁之大觀耶余應之曰
否否過洞庭遊泰岱諸名勝者歲月殆不乏人何韓柳歐蘇輩得意留題
千古稱奇絕而外覺此名山大川竟無益於遊人耶且有曰山之名水之

靈不在孤高與渺深惟幸仙龍之一至在在可作洞庭泰岱觀況此盈尺之地若有天縱之奇乎予不觀余所題此舟之名耶如意者非如一己之意而已也因人寓意無所往而不如焉使英雄豪傑登斯舟也山有虬龍虎豹之狀水有恬風靜浪之模垂子牙之釣進諸葛之竿鱗介歸投爭先恐後際此明良壯澄清天下之志若夫時雨驟至沛然浩往更有風爭石闕之雄發聲震動之怒百折不回如忠烈慷慨之意也倘有懷才志士邂逅奇逢但見諸峯若繪環拱森羅禽鳥飛鳴於芝蘭丹桂之上縱斯一葦覓勝尋芳遨遊泮渙意活機流草木動搖無非化理花紅柳綠盡是文章興盡歸帆停篙溶聚平水綠波靜深有本安行無窮非逐而往非迫而續深得至誠時習之妙於斯時也心靈神化開卷敲詩無不多助如左右逢源之意也此外更有功成身退超然高蹈者時或惠然肯來則有朱簾映水風生曳浪之紋錦石封泥答翠升龜之岸身無君民之責心居日月之

表汎汎其流收帆捲楫聽其所之殊無拘束從容自如俯仰天地豁然太
虛觀童叟之欣喜聽月旦之清評鳶飛霄漢魚躍淵濱猗歟休哉然猶未
也及舟泊翠陰之下攀柳登岸披襟箕踞清風徐來彩蝶音蟬翕然歌舞
石鐘流鼓具備天然若夫童稚酌凌波於前老松送簫聲於後揮觴浩飲
心曠神怡奕商山之棋咏子陵之歌丁丁清絕如遺世獨立之意也噫嘻
撫斯境也在各命意何所不如以之適意而爲樂境者以之治心皆勵境
也可負天地生物之心乎急需其人耳予故操斯舟以望斯人望斯人與
斯山與水作一知己將與李愿之盤谷蘇子之赤壁並傳於不朽也予丁
衰暮竊餘光偷閑學少客不言點首作禮而去裔孫國瑛國煦國彩國巍
素柄香益敬鐫

如意公舟跋

始遷祖士淵公擇湘陰白果最深處修陂堰創基業定壘以貽謀卽今之

南陂老屋塲是也環居皆山上有雙峯撐雲毓秀下有一澗環抱祖居宅前水折處深數仞雲根倚山浮水壁立磅礴底有一竅穿山與隣洞趙家堰相通微波擊石鏗鏘聲有鐘鼓聲上流有石龜隨水消長瀑漲不滅老祖朝聽公字煌耳耄年製一舟常與朋儕槃桓暢敘於其間爰作記以紀祖宅之清幽雅勝云來孫曉菴國煦日暄氏敬拔

廷芳公傳

傳者傳其實行有以式範來茲儀型後裔啓其忠孝勵其倫常俾世世子孫率而由之繼緒不忘斯無愧於傳焉然非孝友傳家詩書啓後創業垂統之可繼操筆者徒鋪名色虛曳聲華奚取焉余于恩榮膏碩而公諱廷芳字卜蘭老先生深景慕焉公系出宋僕射文簡公遺裔朝取公之主器也余雖未獲炙其光儀親其雅範猶幸世好通家不忘先哲兼與令元孫于萬先生同硯日久結契最深習業之餘時或交評往事互論前徽因得

耳熟公之行狀焉公性孝友渾樸厚重沉潛少侍雙親承顏養志極得歡心父逝世喪葬盡哀盡禮悲毀異常無如葬後橫遭豪惡恃富謀吉越界強爭掘塚移柩公慟投官適官他往舟在江心呼難近岸公泣冤伸無路憤極投江官令拯救准訛和結後廬墓一週母逝世喪葬伴宿亦如之公金玉五公居長並敦義讓壘簾雅奏相應一堂家事一身獨任不以外務營心惟督其弟與子姪輩辛勤苦讀無墜乃祖書香自後四弟憲五弟典乃姪重親重洪姪孫見思賢正等俱列膠庠子若孫秀而文者多文名丕著詎非公之切念詩書督課惟慙之所致哉原居南陂析簪後因祖居窄隘偕德配姚孺人暨諸子重愷等五人始遷芭蕉衝開創鴻圖大啓爾宇迄於今層堦叠起增其式廓畹蘭叢發蔚舊班班力者耕秀者讀長發其祥正方興而未艾也皆公之孝友傳家詩書啓後創業垂統之可繼有以開之也公之貽謀何深且厚歟茲因貴族重修家乘爰述所聞於千萬先生者

付諸簡端文雖不足以光先生聊可俾先生之芳躅良模永垂不泯者其在是歟夫豈徒鋪名色虛曳聲華也哉道光己酉科舉人楊雋佳黎氏撰

廷典公傳

桂方就傳時聞吾祖敦素公與吾父次姜公言及高祖每歛歔悼嘆桂詢其故祖曰爾年幼須謹識爾高祖廷典公字仔金慈孝友恭剛正卓犖有大志厄小試幾四旬始入泮以言直逆教授竟坐是遺之公歸謂家人曰予之不遇命也姑俟爾輩爾曾祖重洪公字珂甫兄弟四公行二性穎異豁達不羈公嚴督之廿旬始收歛益力學未幾府試冠軍歸途感暑疾數日而卒公慟之旣而曰死生富貴分定然也胡弗安之後遂絕意於功名構小軒於堂東距家數武額其名曰自得軒杜門不出日焚香讀易以詩酒自娛以耕讀循分訓家壽六十六坦然而逝噫非有得於聖道者烏能貧賤不移肅然自得如是哉余數奇一歲失恃五歲失怙三叔父年廿三

早世三孀母楊一子早孺憫余孤弱躬親鞠育以至成立爾父甫十朝而失恃亦賴楊祖母哺養成人嗟乎余一身兩繫伶仃孤苦無能讀祖父書以光前烈是可慨也爾謹識之勿忘桂不肖未克繼述以伸先人志今冉冉老矣合族續修家乘族房公舉經理譜局茲當歲事敬述所聞以誌在後之人有感於斯而興起焉又桂之所厚望也元孫酉香國桂五鳳敬述

賢倬公傳

古者諱名不諱姓禮也然實如其名又何妨以名而道其實哉凌雲先生者諱賢倬號松巖楚隱公之曾孫固有倬其道卓然爲人者也予不獲親炙道範但予祖父大文公與公爲莫逆交常述公之文品行誼至詳且悉予誌之因爲公傳之公列儒林心耽典籍法取金陳幼列膠庠食廩餼乾隆七年歲薦報授麻陽教諭公之文品何卓然也曾祖楚隱公好善樂施建法華菴捐田供佛公繼志述事積德累仁周急濟貧不離陰隲公之行

誼何卓然也又聞耄耄時製一小舟於向家堰逍遙自得與親朋酌酒圍棋賦詩超然物外有陶淵明柳宗元風味公之志願又何卓然也嗟乎儒者貴不失乎道義顏子云如有所立卓爾見道語也公之文品行誼如是其亦近道者歟今貴族續修家乘請作傳余不敏述所聞於祖父大文公者以爲公傳歲進士候選儒學正堂年姻眷晚李以真頓首拜撰

賢七公傳

公諱賢七字迎福號柳橋堃池公之子也生八歲失恃堃池公不再娶父子二人相依爲命幼從家省吾先生讀書家塾五經四子皆習熟之及負笈遠方名師器重學幾成矣旋因父老家貧兼習堪輿改務農業四方邀請者眾不辭勞苦不較謝資人皆信任之鄉里有雀角公竭力排解剖析是非不畏強禦及事過人恆諒其本心由是名譽益隆鄉里舉公爲團總兼理積穀計簿核算無絲毫爽秉筆十餘年未常更易吾鄉公事甚繁人

多虞詐非素性廉明精神強固不能充是任也公祖天錫公恢宏世業得公爲後勁蓋守而兼創矣地方橋梁廟宇寺觀率皆經紀其事維持公益芳名泐石可考而知也清光緒戊戌歲白果續修私祠公爲糾首忘食廢寢手胼足胝有培根沃葉之志無沽名射利之心急公仗義人皆服其誠篤公與余束髮訂交肝胆相照及論事理心熱面赤必求理之所安而後已古所稱直諒之友不於公見之耶德配廖孺人賢淑勤勞贊成家業令嗣森槐克繼公志喪葬盡禮不吝家財公可謂有子矣茲公族續修家乘董事諸先生咸謂公不可無傳公子森槐近里通家以公傳爲請余義不容辭舉其大畧以彷彿其生平焉平邑附貢生姻愚弟蘇忠漢穎吾氏撰

貴純公傳

公諱貴純字博安凌雲公之長子也乾隆壬戌凌雲公歲薦公亦入泮學憲范賜作述重光匾額嗚呼昔文公云莫爲之前雖美弗彰莫爲之後雖

盛弗傳公豈非世濟其美歟公爲文秀雅聲滿湘江爲人端方世堪坊表
爲先人繼志述事爲後裔課讀督耕遠則紹楚隱公之德教近則守凌雲
公之良規卽當易簣時猶述父書勤儉持家本謙恭處世模二語貽厥子
孫此豈苟爲生死凡列膠庠者可比耶嗟夫以公之父子文行兼優假使
得志登朝安知不如敏中公之以飛白書名臣哉而惜乎時命之見限也
士君子志潔行芳只素位而行獲報無窮耳今公後裔玉筍班班內多創
業垂統者顧業之創也不創於創之日必有所由始統之垂也不垂於垂
之日必有所由基揆厥所自良非偶也世德所求故也茲修家乘宜作傳
以紀公己卯科舉人揀選知縣年嫻眷晚胡發蓉頓首拜撰

貴拔公傳

吾伯父直齋公諱貴拔字高萃立心忠厚制行光明早歲能文藝中年理
家政雖曉世事而率天真自十六世祖可敏公遷居馬王橋越乾隆癸巳

建私祠伯隨叔祖九均公不辭奔走祠成得置祀田至甲辰伍市建祠修譜己酉告竣伯從諸族尊後歲其事焉仍與白果合置祀田伍市而本處亦立祀田每年臘月兼善展奇兩公子孫輪流承祭自後往公祠私祠與祭兩公子孫亦值年輪走以賂途遙遣費皆公出其結念祖宗鼓勵後生思深慮遠有如此者故族里戚友欽其正直亦服其公平皆以爲吾先祖有是德宜其有是子也而伯母彭孺人賦質溫柔克勤內助生女二長適彭諱監臨次適鄒貢生諱柄子一諱國魁字星點號斗城秉性堅剛爲人聰敏讀書之暇兼善醫方鄉鄰有招之者無不輒應卒未嘗取人一錢也甲寅伯染疾不能起時勲與堂兄珩方五歲伯臨終前一日呼斗城兄而命之曰吾不見此兩子讀書各與錢二伯積爲買書計後當無廢此事也並以之囑吾父焉蓋其體吾祖而望吾父轉及我後人一息尙存志容少懈哉勲今年三十有餘矣不見伯大人且不見吾父並斗城兄已先吾父

而逝也悲夫爰於譜成之日卽吾父所傳語者撮而記之竊不禁怛怛然矣胞姪國勲謹撰

貴卿公傳

傳不傳實無貴爲傳此余雅不爲人浪費筆墨也若於淵公裔雲階先生則有不能已焉者稽由南陂白果洞遷馬王橋可敏公八世孫賢才之令嗣三伯諱貴拔乾隆辛亥捐館先年贊理祠譜與其品行實跡詳載本傳中仲諱貴仕履規蹈矩有古人風先生居叔諱貴卿字萬瞻號雲階乾隆庚辰七月十八日申時生性敦敏豁達不染世俗不牽勢利其篤倫也事親孝事兄友教子姪以嚴成其慈其敦本也卽可敏公歸葬南陂曾率子姪輩於塋所置田豎碑以誌始遷之祖之邱首而不敢忘者可慨其他其於族里戚友舉以誠信相待何明經進士三山前輩係先生業師出貢時重貺外又率硯友解囊合得錢數十緡爲師出仕計助嘉慶壬申旱荒家

食尙歉猶借穀數十石爲覓食者備館鄒祠時附近有數古墓崩塌倩人
牢爲培補其隆師重道與憫窮民澤枯骨又如此積學有年門下士登黌
序者有人生女一適其徒何君儀九丈夫子三長國榜三國經讀書明理
後卽令經理家政以裕養源惟仲君國勲字慎徽號惇堂者自束髮受書
親承庭訓先生曾糾同志設有關聖帝會嘉慶庚午九月忽夢仲君應武
試弓箭皆自己所爲越明年七月仲君果受知於文衡徐公至誠感神神
先示之兆也所不解者以命中之技而自試屢屈強弩人歎爲遺珠不置
而先生要晏如也其德配余孺人秉性柔順敬事夫子同樂分甘嘉慶庚
辰一歲連舉三孫多男之慶如斯者亦鮮況後之相繼而出者且十有一
矣異日科甲蟬聯簪纓鵲起不有可操左券者耶余與先生同庚甚契竊
謂莫逆交自得長聚首不謂道光辛巳三月二十三巳時而先生竟賓天
也余輓句有云卽今早發華胥夢何日偕遊故國春蓋深感哲人萎矣再

親芝宇無期矣悲夫茲我合族繼訂家乘爰撮纂先生懿行碩德之較著者編之簡端一以誌善人君子不忍使之歿於世一以俾知善人君子之必不見歿於世云是爲傳龍公房族庚弟達軒貢賢新應氏拜撰

國勲公傳行誼詳載邑乘

歲甲申向氏繕修家乘吾師惇堂先生文孫樾青昆仲以余從先生遊日久屬余一言傳之謹按公諱國勲字慎徽號惇堂行二公性方正繩趨矩步言行一無所苟尤篤於內行自少以孝友稱讀書素穎異年方髫髻授經已能通訓詁時太老師雲階先生積學未遇課公讀倍嚴習帖括業方授以開講不弔月卽能對股又弔月卽成篇幅是時諸名宿偉視之家故寒素年未冠卽居講席課讀之暇猶攻苦治經史日有常課尤究心宋儒書摻窮理窟年二十有奇學旣成以縣府前列受知學使徐公補弟子員目後歲科試輒列優等以文鳴湖湘間卒以廩缺未出僅補增廣生道光

甲辰丙午鄉試鼎薦備中均以額滿見遺科第埋歿英雄願如斯哉公既
數奇不偶遂絕意進取於時從學者日益眾居舍不能容乃僦居各處祠
廟歲常二三十人時人有小書院之稱如是者蓋有年其立教宗旨則以
修身立品爲先以窮經爲要行文則辨香先明及國初諸老下筆千餘言
立就每課齋內外凡二三十藝試期近則倍之旁午紛紜令人目迷五色
公塗改點竄竟日立辦莫不迎刃而解動中肯綮講學六十餘年及門者
先夜近六七百人得其傳者亦四五十人登賢書者不一而足列膠庠者
蓋指不勝屈焉生平涵養粹然滿腔仁愛先是公伯兄季弟未起家時或
匱乏時分館穀之餘與之弟子貢不能備贊者或竟壁其修金門庭內外
嚴肅雖和里人化之晚年春秋益高家居頤養築室舊廬東偏春秋佳日
召耆舊雅集觴咏以爲樂時引古義相切劘常手周易一卷樂而忘疲其
耄而勤學又如此迄於今先生往矣而人其境道其言論丰采猶肅然起

敬入其室雖婦孺亦循禮法無訥諄聲文孫樹青渭青文行雙美能讀祖
父書其所至正未可量蓋先生之世澤孔長矣又況門下士之立教於時
者一本先生之教以爲教小子後生私淑一如親炙不尤見先生教澤之
流傳未艾哉嗚呼假使先生得志於時其展布設施必能轉移風俗無疑
也然吾嘗以造就人才之責求之當世士大夫往往難之何哉此中孰得
孰失必有能辨之者余故具道其習見習聞以明斯文一脈之宗而爲文
中子私誄云清光緒十年甲申閏五月受業優增生鄒春溥頓首拜撰

國正公傳

向公諱國正字順卿湖湘一偉人也生平寡言笑惡詖諧立心行事卓然
自命不凡清咸豐初粵寇蜂起所過府廳州縣靡不胆落神驚望風奔走
甲寅夏五月有長髮賊數十竄沅江之泗湖山公招團練極力防禦賊不
得逞憤恨而去誓將糾大衆至此肆其焚掠殘殺而後快公率勇敢強有

力一以當百者數人持長槍大戟追賊至中流盡俘之并獲賊船錢米貨物賊眾斬溺無遺自是寇不復至山人得以安堵而公乃不幸受重傷死矣事聞於朝賜祭葬給銀百餘兩例贈校尉五品銜迄今播爲美談口碑載道是公勇義之氣不滅與蘭芷同香湖山並壽也哉今值公族續修家乘公家孫振祁丐余傳余不揣謏陋爰就父老傳聞朝廷旌表之大節珥筆而爲之傳以昭示來茲云世再晚黃翼贊鞠躬敬撰

國質公傳

公諱國質字在茲孔授公之哲嗣也生平忠厚存心淑均秉性內則順於親長外則孚於友朋雅度雍容儼有詩書之氣純風沕穆恍如懷葛之民讓水廉泉不至貪天功以爲己利禮耕義種亦惟治情田以養子孫易曰積善之家必有余慶吾爲公卜焉德配狄孺人溫恭足式勤儉宜家曲和鵲絃眉齊鴻桮初公未生男輒以爲慮孺人謂之曰如公之爲人必無乏

嗣之理及公年四十舉子泰福字德昌其立身制行追乃祖乃父誠所謂厚德載福也今見桐蓀茁起椒實蕃盈益見天之報施不爽故樂爲傳之清附貢生族姪孫振鏞謹撰

顯考岱峯府君暨顯妣何孺人行狀

嗚呼先考棄世年屆六旬先妣之終得年止五十矣不孝鏞與不孝鏞奔走名利頽墮因循未遑續綴遺徽求表誌於當世大人先生以光泉壤不孝之罪擢髮難數矣今歲甲申闔族續修譜牒因於家塾追述成篇懷我二人不禁潛然泣下嗚呼先考於道光戊申己酉值先大母身嬰疾病口不能言手足不能持行先考館於家課讀之暇侍湯藥奉飲食兩載未離牀蓐先大母卒先考哀毀骨立治喪必誠必信嗣是先大父外館先考亦外館越數年先考念先大父年老不忍遠離就近同館朝夕起居循時侍奉罔不先意承志至飲食衣服悉爲調停猶其末也先大父性端方課家

嚴先考雖年近六旬亦必出告反面光緒乙亥先考入祠冬祭不登席歸是夕先大父考終先考躬親易簀論者謂孝原天性使然先考性渾樸寡語言不理世務惟親支有忽難必極力排解之生平廉潔自持威豐間合族重修家乘先考從諸族尊後戚其事焉非惟不取心力之資並出私囊以給公費光緒乙亥倡率大灣小橋蓮花塢東塘坪金雞山各房入神主以妥先靈其敬念宗祖如此他如先人生辰忌日必恭薦時食致愛致慤恍惚如對先靈值除夕必端坐焚香待旦終其身無懈先考之奉先禮神何一非仁孝之心所推而暨哉先考掌理關帝君會不數年廣置田畝簿據分文清楚同事咸服其公先考兄弟四先考其仲也平居聚首無纖毫芥蒂見於詞色析簪日毫不強爭惟孝友于兄弟先考有之先考晚年家漸匱嘗謂不孝等曰田園身外物也有子讀書吾死亦能瞑目爾曹亦應知龍無尺木不能乘風雲而上天士不得科名則無以取青紫而食詩書

之報乎吾困蹟名場阨於命也然鬱久者發必光爾曹其勉之況吾家讀
書至爾曹五代守先待後責任匪輕不期丁丑院試不孝鏐既得復失先
考謂不孝鏐曰吾兒劍氣珠光決不終掩雖爲不孝慰然未嘗不撫衷自
悲也是臘先考倏膺氣喘不數日竟棄不孝輩矣嗚呼身遭大故何志功
名庚辰服闋不孝鏐仍復功虧一簣不孝鏐幸補弟子員次年列優等先
考有知想亦含笑九泉也哉先妣何孺人眉齊鴻案手挽鹿車有女丈夫
風其事翁姑以孝處妯娌以和尤勤女紅躬紡織端莊貞靜客服淡雅雖
飾不華言語慈祥雖怒不詬臨終之日三黨七族靡不稱賢至其責子讀
書則一如先考意也三弟鏐繼三叔父爲嗣幸能成立鏐舉子一興藩鏐
舉子四興潛興漢興治興淳頗覺頭角嶄然神采煥若殆有可讀書者惟
恨不孝輩潦倒無成時至中年猶未榮膺一命光及泉臺小就苟安殊深
愧汗倘荷先靈默佑光大門閭克邀封典仰祈鉅公相贈鴻詞俾我二人

不朽則不孝銘感無既矣不孝男振鐸涕泣謹述

丹山公傳

凡稱人者每震其顯榮赫奕謂其可述可傳而豈知可述可傳者不在顯榮赫奕而在實行伏之爲潛德之幽光發之爲老成之行誼吾鄉丹山先生之爲人也聰穎夙成金相表度玉質昭光守懷葛之衣冠遵唐魏之節儉到老不知塵市生平最喜桑麻幼勤讀詩書壯篤修家政情殷作實苦力撐持境遇漸豐時則以橐餘分潤肯與鄰族通方催債而貽饑寒之語公再不踵其門至老不改遠近多德之及今口碑載道此固公行之表表者也公不但公誠與物亦且孝友性生克恢前業大振家聲勤課讀重儒修身膺登仕郎嗣君嶽生列成均其光大門閭何可量哉且也櫛蔭之下眼垂青棣樓之中眉獨白昆仲五公殿其後無殊寶君五桂輝映後先鴈行和集孫子盈前分王氏之甘效張公之忍一門之內和氣薰蒸猶且醞

釀閔深床頭有酒認爲醉鄉嘗語人曰惟有飲者留其名爲人若此是真能盤桓邁軸而樂其樂者歟一生泯雀角之爭合室集燕安之慶無驕不如好禮剛直濟以和平嗟夫世人方競浮囂一事倖成務張聲勢一物無濟藉以欺人或矜才或使氣生前赫赫歿則寂焉無聞者不知凡幾若公之懿行如是宜其可述可傳而爲諸牒光也因不揣固陋爰爲之銘曰
偉哉我公方而面紫而瞳行高品重氣俠才雄超羣類唾時榮一抵掌濟因扶窮一舉趾化俗成風謀貽燕翼美德誰同山高水長忘歲月豈非居然忠厚長者髣髴醉翁己丑恩科舉人王光炳謹撰

森槐公傳

公諱貴庭字森槐號陰棠幼讀詩書性聰慧年雖幼無異成人稍長尤勤於學見父母年邁家非甚厚送讀未易遂棄學從事農業躬耕南畝以養親兼理家政內外整肅莫不懍懍聽命不數十年食指日繁而家亦隆隆

起田園增舊矣棟宇增新矣而不以家道既豐偶改常度克勤克儉之風天性然也最諸子耕讀就其性之所近使各居一業或營商或務農不合一有懈惰因各婚配後未有生育遂向族中之親者擇子入繼爲三子先後成就人或謂其太早公說繼後生子更可喜也人豈患多耶其長顧遠慮有如此者所惜者公以晚年疊遭世變奔避驚恐不堪言狀幸天佑善人獨得無恙自是優游林下終老餘年此詩所謂昭明有融高朗令終者也茲值修家史其季子視湖囑余紀其行誼余與公居最近知其大概敢以不文辭謹揭其厓畧傳諸後人至其他善行難以枚舉後之人自有能傳之者無庸贅焉平江邑庠生弟李鑄人敬撰

德昌公傳

昔歐陽公稱連處士謂其篤行至性無言而化鄉俗輒嘆叔世不可復覩斯人本軍特別黨部少校主任幹事向君浦雲嘗爲余言其先大父德昌

先生之懿行深恨余生也晚不克處下風而親教益浦雲先大父爲遜清太學生幼習詩禮天資卓絕以家計窘迫膏火維艱遂輟業由是伏處家園綜理鄉政曾一度被選爲議員參議邑中事性慷慨而慈祥凡救災卹鄰捐田奉祀義所當爲者無不引爲己任視世之毀譽榮枯泊如也常治事腦力特強逆料未來宛如燭照數計豪髮不爽同輩戲呼諸葛公每笑應之今浦雲敦品立行黽勉從公不墜先人緒業是非先生之遺澤歟嗚呼遜清末葉世亂俗澆如先生之積德累行則連處士不足專美於前矣近以其族續修譜牒特爲是傳以付剞劂余雖不文不能彰先生之美而竊思步歐陽公之後塵託先生之大德以垂不朽故直陳其事以梓之不敢有一字溢美將以傳信也時至今日利欲驅人若先生之胸懷淡定赴義勇往豈易得哉豈易得哉是爲傳中華民國三十三年甲申四月陸軍第二十軍上將軍長楊漢域拜撰

振伯公傳

公諱振伯字宣明號蕉園太學生公父捐塵踰月公始生孤苦零丁幾難成立然公性警悟智慮絕人韶齡卽嶄然見頭角諸伯叔咸器異之年十二孑身居爨慨然以光前裕後自任廣生植權去取廓先業而大之嗣是家日豐食指林立而自奉彌儉約鄉黨豪侈習爲一變至戚黨有急輒推解不少吝公剛腸嫉惡風度凜然臨財一介不苟立身制行爲鄉黨推許睚眦之隙多就質焉公口若懸河剖析動中肯綮法言巽語聞者率感悅息爭故環公居村遠近數百家無鼠牙雀角之論者謂方之陳仲弓王彥方無多讓也公孝友性成常以不逮奉養爲恨佳節忌日躬執遵豆孺慕哀情溢於言表又推其仁孝之心以敬宗收族凡宗祠公務毅然身任不避勞不居功每遇時祭必先期詣祠齋宿駿奔執事數十年無異也公性嗜學自傷幼孤且食貧躬耕作不遑就學僅以三餘從塾師通訓詁後經

理家政遇閒暇輒手一編玩索晚年益孜孜不倦對案披吟無間寒暑有疑義必默識考詢顧獨觀大畧不爲章句學自聖賢經傳唐宋詩文集下至稗官野史醫卜星相之書靡不涉獵得其要領閒游心於奕客有解者輒酬酢彌日不飲酒而文士過訪則喜設酒款之與之商酌古今辨晰名理正襟危坐纚纚數千言聽者忘倦諸名宿多歎公耄年勵學爲不可及云原配楊孺人淑慎其身內職修舉先公卒繼配吳孺人撫前室子婦以慈稱公舉子六教以義方訪名師俾受學季子筠圃恂恂儒雅克繼公志從余遊最久故余耳公德最詳又嘗往來公鄉而見稱頌者弗衰也故樂爲傳之蔡邕書郭有道之碑可無愧色也已至公先世發祥子孺繁衍詳載譜牒不贅舉人福農庾億拜撰

越青公傳

先兄越青公天資穎異幼時先父岱峯公授之書過目成誦繼從先大父

惇堂公遊志承祖硯其學以經史爲根柢其作文每下筆千言如天馬行空不可羈絆家故寒素弱冠遂居講席課徒之暇尤勤操作每爲諸名宿所極賞識積稿亦不甚惜聽人持去壯年性益超曠跡弛負累放浪形骸殆有得於卜氏達權之學所謂大不踰閑小可出入者乎而卒困躓童場清光緒丁丑歲試兄挑覆因錯誤見遺庚辰歲試與鏞同挑覆兄又以額滿見遺以兄之才與學而未博一衿以終且夫婦相繼而亡子孫並傷不祿真數奇也烏可以成敗論哉嗚呼兄之沒光緒十年八月也當日者風雨連床弟昆同塾食先人之舊德誦前代之清芬會桃李之芳園叙天倫之樂事數十年來轉瞬間竟成幻夢矣追念鵠原愴然涕下胞弟振鏞識

振科公傳

公諱振科字少登號熾蕃一號憲吾壽山公之嗣子也天姿純粹幼讀書識大體及長能文藝諸名宿方以達到期之乃一片未拾例貢成均廕職

棘闥難伸壯志古人謂文憎命達不其然乎旣而壽山公去世公生父嵐霞公謂公毋甘孺人曰家事浩繁需人共理公於是輟詩書理家政與乃兄曉春公協力同心守而兼創廣田園新第宅延師家塾課讀之暇賓主更詩酒怡情論者謂其塵俗不染勢利不趨殆有竹林之風味歟且公素慷慨好義如書邑修聖宮立興賢堂暨祠堂廟宇寺院橋梁一切善舉靡不泐其名凡事關鄉里公務必挈領提綱洪纖就緒尤見公之熱心公益維持桑梓也清光緒甲申白果增修祠廟豎立中亭公夜寐夙興不辭勞瘁是歲兼修族譜公竭力贊襄並墊金以藏其事根本之地其培植有如此者況公事繼父母與事生父母皆先意承志定省無疎及其先後下世喪葬盡禮可謂君子篤於親矣宜乎一家內外不下數十人共敦雍睦庭無間言厥後兄弟析簪諸凡產業公不以兩股拘之非孝友兩全而能若是乎德配劉孺人慈惠溫恭克嫻內則事翁姑以孝處妯娌以和誠子婦

以義齊眉舉校白首同心孺人卒於清宣統己酉夏公卒於是歲冬詩稱偕老豈偶然耶於戲公與余平湘接壤始爲詩書友繼爲兒女親公冢嗣楫興從余遊數載以厄於文試就做邑武魁洪舉廷兼習騎射獲選澤宮仲君叔君季君皆磊落不羣一時孫枝疊起競秀爭榮將見恢宏先緒丕振家聲固可於公之厚德而預卜也茲值續修家乘特舉其梗概附諸簡端以爲後世觀型之本云平江附貢生嫻愚弟蘇忠漢穎吾氏謹撰

汝霖公傳

傳者傳其人之事業以昭示子孫若徒筆墨鋪是欲彰斯人之實而反掩之也安能恰肖其人哉吾族汝霖公泰榮公之冢嗣也兄弟二析箸時田僅數斗公竭力經營出作入息由嗇漸豐而勤儉之操依然不改是豈浮囂氣習所得染耶夫身歷艱辛者遇事每多慳吝公則慷慨好義凡有公務及募修廟宇橋梁等項輒樂爲輸助此以徵其立心甚遠而所見者大

也況乎賦性耿直遇族黨有爭論事必爲勸解方之魯仲連王彥方多讓也平居野服逍遙好覽古典裨官野史之書寓目不忘易曰幽人坦坦庶幾似之前清光緒甲申合族四修譜牒公贊襄其事曾不告勞經營際明愈盛兩公簿據毫無苟且戊戌增修祖廟用費巨金亦賴公蓄積之力今雖人往風微而父老子弟猶嘖嘖稱道勿衰非實至名歸其能若是乎德配楊太安人撐持內政庭幃之內肅肅離離蓋其淑慎溫恭有以致之耳今屆七秩壽辰合族贈以寶婺輝長匾額洵非虛美也長君桐森次君慶生皆器宇不凡克承先志是以壘簪韻叶合室太和行見門閭大啓蘭桂叢生將來之發越正未有艾焉弼以族誼得悉其本末故樂爲傳以誌不朽云清太學生房姪孫良弼嶽年氏謹撰

振鏞公傳

先生諱振鏞字蔚青號虞笙向姓先世由河南開封遷江西再遷湖南湘

陰遂爲湘陰人曾祖雲階祖敦堂父岱峯世繼詩書并著文行先生幼承家學踔厲奮發文名藉甚年三十補博士弟子員蓋自敦堂公至先生三世青衿而皆以名諸生教授鄉里邑之高材生奏就而執贄發名成藝者踵相屬也吾亡友彭斟雉鼎芬績學阜文從政有聲於先生門弟子中著籍最早其服膺亦彌虔鵬雖未獲請業門下亦嘗追陪杖履挹其言論風采退而有茂叔光風霽月之思焉蓋其學養之爲感召者深矣有宋晦庵朱子之學窮理盡性博大精微而其本諸躬行心得之餘叮嚀反覆啓發後學尤在論孟學庸集註一書先生學宗程朱言笑不苟講授四子書必兼及朱註謂此爲學者修業進德之階梯從則貞吉違則凶逆以是投徒亦以是課子以是檢其身性篤孝泮游時其太公太母已棄養不及見引爲終身缺憾每值父母生忌辰必齋沐而後祭已之生日亦如之數十年以爲常兄弟三人季楚青出後其叔伯樾青與先生壘簾唱和如東坡之

於子由樾青公挾藝于有司累拔而累黜鬱鬱賚志以歿先生大慟撫其子伯韓如已子以養以教以至於成人無何伯韓亦物故悲悼之餘無日不詔諸子而申儆之於天命之靡常世澤之難繼也尤兢兢三致意焉向氏先世自白果洞遷居今之武昌鄉三合廟其總祠暨支祠均距所居遠甚先生歲時承祭駿奔對越必躬必虔又先後兩修族乘皆董其役惟精惟勤不敢告勞蓋愛敬之心根於中而達於外自門庭而推及宗族其道一耳民國紀元後膺選武昌鄉董及縣議員壹以廉正稱平居視地方公事如其家人所愈憚當之愈勇羣疑而不眩眾折而不撓其先後仔肩艱鉅以底於成者曰同善公曰育嬰公曰社積公曰團練公曰同善學校以及全鄉小學十餘所至今民食其澤思之不能忘乙卯夏南北軍交闕湘境北卒潰竄入室家人走避卒炊爨不戒於火勢將焚廩先生聞警馳歸慷慨陳詞於其酋酋感動亟揮卒滅火旋引去比鄰數十舍皆賴以全

夫君子居上則溥萬物之施在下則興一方之利易地皆然仁也處常則折旋蟻封而若驚臨難則橫厲虎穴而不懼仁者必有勇也今於先生之行事見之人或以是爲畸異之行而不知皆出於此心之不容已卽天理民彝之所當然程朱之學窮理盡性其致用卽在乎此自正學不明俗士窮居習爲嬾阿苟偷門以外之愁苦怨嘆漠然若越人視秦人之肥瘠私欲錮塞而至大至剛之氣梏亡粹履險艱狼狽而不知所措者比比然也聞先生之風可以媿矣子五人伯昭仲求綬珊皐曜昂視其才之所宜令分習耕讀工賈課績程功不稍姑息一家之內有乘車者卽有載車者各循其分而安其常里人士相與豔稱之仲求曜昂先後侍讀均能世其家學仲求歷司法篆而曜昂歷襄交通工業教育諸要政所至人爭推重先生教以辨義利嚴取予與慎保家風凜凜乎防閑之不可踰也家居整潔片紙纖屑不使遺地下動止飲食均有常度齒逾七十而雙目炯炯夜

昏能於燈下閱蠅頭小字往來鄉里徒步曳杖若少壯然易曰家人嗃嗃
貞吉記曰君子莊敬日強斯其徵已以民國十二年癸亥九月初六日戌
時卒春秋七十有四配同里徐孺人幼隨父仙圃公及母氏李寓湘垣敏
慧嫻女誠書數皆無師自解紡績針黹之事尤精詣絕倫年二十歸先生
事重幃以孝聞孺人雖久習城居不諳田家操作然自其爲婦後而箕拘
井汲澣濯刀匕諸瑣務皆能躬任其勞行之未嘗有不安也先生家貧孺
人時出外家私財濟緩急泊重閨繼逝昆弟析居而境益窘先生終年館
於外家事無鉅細壹委諸孺人孺人謀初終終悉有輕制量入爲出內外
井井不足則以針黹所得補之自奉儉薄常甘藜藿而賓祭之共必豐族
嬾任卹必殫其力所能至平居好儲藥物且多識驗方鄰里疾痛疴癢踵
門求藥手劑輿之輒奏奇效其明敏慈惠之行多賴是晚歲子婦孫曾數
十人皆承孺人之教秉禮習勞衷和襟順門以內無詬誶聲故孺人於其

家居時則皆曰賢女洎其爲婦爲母時則又皆曰賢婦賢母以民國十七年戊辰十月二十日申時卒春秋七十有八子伯昭後先生十一年卒仲求與孺人同年卒孫男十五人良棟良榆良枚良杓良檢良校良椒良業良桷良柯良棟良機良梲良杏良宋孫女十一人曾孫男十一人家杰家馮家熙家烈家燮家壽家燕家煨家范家武家幹曾孫女八人先生旣卒之二十年曜昂追述先德以壯抵鵬屬爲文傳之鐫諸家牒鵬自幼時聞國泰寺有所謂燈會爲鄉先正同明相照同氣相求倣東林蓮社故事而立者也而雲階公于時授徒寺中實爲之倡吾先房祖超吾府君吾先大父樞山府君弁隸會籍歲月不居老成凋謝當時會友都計二十四人皆鄉里一時名宿不數傳而樂卻之後降爲輿臺其傳嬗詩書不絕者今乃寥若晨星之可數先生趾前美而啓後光學足以立教而廣才行足以植身而拔俗自事親從兄以逮措施於宗族鄉黨訓迪於家人子弟者皆足

以垂休光而綿世澤天立厥配含章可貞以柔承剛則篤其慶積善之報
正未有艾而吾家自先大父後服疇食德繼繼承承亦差幸未墜先緒吾
父存心利物剛毅自強之風尤多與先生合鵬雖無似獲與仲求曜曷論
交以文字道義相切劘兩家喬木依然楹書無恙嚮之所謂燈會者乃若
光遠而有耀焉嗚呼廢興存亡之故雖曰天命豈非人事哉爰綴次先生
學行之大者著之於篇匪獨以闡幽光而貞諸不朽抑欲使兩家世亂感
發興起以保世滋大於無垠也中華民國三十二年癸未秋月世愚姪前
任邵陽縣長邁南駱鵬拜撰

蔚青公行狀

嗚呼維我府君棄養倏逾二十年矣尙使天錫上壽今猶健在亦不過九
十有四乎欲養而親不待天實爲之尙何言哉吾向氏先世籍河南開封
南宋間南陂府君諱士淵走江西轉遷湘陰白果洞卽今之長樂鄉向家

洞也至明季竹軒府君諱可敏自白果洞遷居馬王橋卽今之武昌鄉三合廟蓋族居在先廟成在後故不以廟名而以較遠之橋名定居以來六代單延不絕如縷傳九世爲我高大父雲階府君諱貴卿始以詩書復門祚我曾大父敦堂府君諱國勲大父岱峯府君諱泰堃堂伯大父莘農府君諱泰衡世列膠庠敦行誼邑中偉彥出其門者後先相望府君兄弟三人府君居仲字蔚青諱振鏞號虞笙清道光三十年庚戌正月初三日丑時生先叔楚青公出繼叔祖府君與先伯樾青公幼從學先曾大父及先大父勤苦力學不數年而文名藉甚府君甫冠肄業仰高嶽麓書院試輒冠其曹光緒庚辰歲補弟子員爾後歲科試時列優等先伯樾青公應童子試屢膺挑選不獲售中歲鬱鬱以歿府君撫從兄伯韓教讀婚配一如己出無何伯韓兄中殞府君傷之嘗訓不肖兄弟曰吾生質遜於爾伯學亦不逮今爾伯父子均資志以終吾懼世業之難繼也今幸先緒未墜爾

兄弟其勉之府君生不肖兄弟五人先伯兄興潛字伯昭先仲兄興瀚字仲求三兄興治字綬珊四兄興涂字駟阜不肖興滌卽曜昺其季也不肖生先大父母早世故府君事親之禮不獲知惟幼年所習聞者府君掇取科名常痛我先大父母不及見引爲終身恨事偶一念及泣數行下每屈生日及先大父母生忌辰必齋戒沐浴以祭數十年無或懈焉嗚呼府君事死且然則其事生可想見矣家故寒素專賴課徒爲生三十餘年門下通才指不勝屈彭君鼎芬其最著者也彭君名樹雉泮遊時府君賀以聯云向說是龍標洵奪錦彭鏗辭雉鼎有餘芬彭君具啟府君有云年方舞象曾遊東魯之門向說是龍有負先生之望云云先仲兄與不肖先後侍讀或從庭訓或隨外館各越十年六經皆府君之所口授四子書且兼授朱註口講指畫耳提面命雖寒暑不少輟不肖幼好嬉遊每以作輟無常貽府君憂尙記其諄誨曰余無他言爾當自命爲何如人耳今不肖碌々如故追懷遺訓實慚且

忤先伯兄與三四兩兄則分授農工商諸業恆以勤苦耐勞相督責而於治家修己之道尤不惜反覆叮嚀故鄉里稱吾家以詩書門第兼重技術治生爲饒有法度府君之門人何君翼猷與人言吾師之子乘輿者有人載輿者有人一時傳爲佳話不肖兄弟行能無似何足妄邀稱譽然竊各有職業粗能自立無隳行敗名見惡鄉里以貽先人羞是皆府君之所賜也有清季葉學校初興士大夫多蔽於科舉故習府君知世變日亟非應時勵學無以自存光緒丙午歲令先仲兄與不肖肄業縣校逾年復令先仲兄赴省習法政不肖習工業辛亥卒業適當鼎革先仲兄委任漢壽司法不肖襄理株萍路政得博升斗以資奉養因勸府君謝館穀頤養餘年教讀辛勞至此始獲休息然已老矣自是以後先仲兄改任醴陵地方法院檢察官復歷任醴陵瀏陽南縣會同承審員代理會同知事不肖由株萍鐵路調湘鄂鐵路旋以南北交闕回里從事本縣教育歷任縣教育會

主任縣立高等小學校長教員縣視學勸學等職每與先仲兄歸省府若必諄諄訓示謂吾家世詩書重廉恥汝輩贊襄公事須辨義利嚴取予慎保家風在外時奉手諭類皆儆語箴言是以先仲兄任司法行政十餘年不肖從事交通教育實業各界歷二十餘年雖無他長然謹守繩墨從不敢妄干非分是皆由服膺我府君遺訓所致也民國癸亥歲眾議院議員選舉府君初選當選政客方輩鉅金相競有干府君以私者府君正色却之旋縣議會成立被選爲縣議員鄉自治開辦復選爲本鄉鄉董奉公潔己物望攸歸乙卯六月湯督離湘潰卒竄入住宅舉室驚避卒炊爨不成於火勢將燎原府君馳歸告其酋慷慨憤厲酋感動急揮卒滅火旋引去同居十餘家廬舍皆賴以保全其臨事不惑至誠感人有如此者他如地方一切公益事業若同善公保嬰公社積公團練公或獨力提倡或協同整理類皆規模備具實効昭彰鄉里至今稱光不置本鄉教育曩以風氣

閉塞難於圖始府君任學務委員會主任有年於本境三合廟以手創之同善公田租八十餘石提充學校基金首先開辦藉資倡導因卽以同善名校至今仍之復與全鄉賢達殫心籌畫次第成立小學十餘校教育始有起色本族宗祠遠在平江伍公市支祠更遠在長樂向家洞歲時祀事府君必躬往與祭清光緒甲申與民國甲寅宗祠兩次纂修家乘府君皆董其事宗族尊長交相推重生平性嚴正不苟言笑見操行不檢者輒呵責之不少假人咸敬而畏之家居好清潔勤灑掃雖紙屑粒米遺棄地下必一一拾之年逾七十而飲食起居如恆雙目炯炯閱書報小字雖昏夜不借鏡光往來邨里間徒行曳杖其健步若少壯然不肖兄弟方竊幸其身之康強可躋上壽也民國癸亥八月二十九日乃因澡身感寒初患嘔吐時不肖兄弟在外者適均告歸進以祛寒藥劑旋愈九月初四五日復寒熱往來初六轉劇晚九時欲起大便不肖等扶就便器猶咬牙閉氣作

出糞狀詎知不上升一轉瞬間遂棄不肖兄弟而長逝矣嗚呼痛哉卒年七十有四葬三合廟上首廟嘴上田穴坐庚向甲先妣徐氏後府君五年卒厝其右向同先伯兄興潛後府君十一年卒先仲兄興瀚服闋後復任汝城南縣沅江承審員後府君五年卒不肖復任長沙縣署交涉科長株萍鐵路材料課長南潯鐵路文書主任湖南紡織廠駐漢經理倉庫主任諸職孫男十五人良棣良榆良枚均興潛出良杓良檢良校均興瀚出良椒良業均興治出良栩良柯良棟良機均興涂出良梲良杏良宋均不肖興滌出孫女十一人曾孫十一人家杰家鴻家熙家烈家燮家壽家燕家焜家范家武家幹曾孫女九人不肖顯揚無望莫報劬勞謹質言記畧俟當代立言君子哀矜而錫之傳中華民國三十二年癸未秋月不肖男興滌曜昂泣狀

興閻公傳

先生諱興閔字香欽號錦春篤行君子也少讀書未有所成父三易公饒智計服賈歎於貲稱貸而益之會時不利悉數折閱跳身走戎行入金陵伍籍亦有年馳一紙召先生先生往侍爲人傭書耐勞苦謹操持言動雖微不肯苟且久且益堅而譽者日至卽素所弗識皆竊竊稱之是時江南凋瘵百度方新大府湘鄉曾文正公蒐遺索滯物色人才而于砥礪名行愛惜廉隅之士尤爲注意苟有所聞輒志諸夾袋慮材器使受之者恆莫知所自一日先生閒坐營中忽有隸韋附注者捧公文而前曰制軍有命委辦街總事宜先生踴貽良久曰誤乎使者曰何誤之有先生曰某寄跡于茲交不離部曲名不達官長將焉獲此使者曰非小人之所得知也請往徵之比至督署文正公笑而勞之曰余習聞若名稔若行今日之役市井喧囂人物雜沓幹理亦不易易尙愼旃哉受命而出欲究推轂之由終莫識爲誰何金陵自戡定後五方聚處而湖湘人士恃功驕悍殊難馴輯

控馭失宜動卽鼓噪先生持以廉靜裁以明決無偏徇無激烈居民大驢
文正公悅甚飭兼官錢局局務先生精權算慎取與三年出入有經文正
公憫其耿勤將官之念申江貿易滋盛爲中外一大都會派往勾當蓋將
以酬其庸而卹其家焉旣首途旅焚其次並委札失之適滬上亦同日告
災先生歸復命乞假回里文正公留之不能得計先後所獲薪貲約千餘
金藏之篋笥家之人無知之者日覓先人債籍迄無留遺竊聞某某家嘗
有往來踵門求償或笑曰君旅橐不豐何遽爾也姑置諸先生唯唯綜計
子母曲與料理亦不自言其故大致就緒而小數未悉則使人鳴鉦告眾
諭以已意凡乃父逋負概與清釐無少蒂欠鄉里誦之自餘存款計四百
金悉以奉母以二百金託老友江君吉臣經管薄取其息又二百金不取
息請某司守以佐饔飧先生之意將復渡江東下報曾公知遇之恩無何
而曾公移督北直矣而先生亦倦而思息矣此或有天道與顧吾思先生

之爲人不收效于其身必于其子孫厥後家日以康詰子文瀾年甫冠連舉丈夫子二今則均能讀書矣門第之興庸可量耶先生性方潔寡交遊獨心契先君子每歲必走倅相招至必作數日勾畱白首青鐙傾譚竟夕聞者羨焉今傳先生不能無遺痛也已歲在尙章赤奮若葭月吉日誼愚晚周匝清撰

渭川公傳

向公渭川士林之傑出者也性聰慧好學尊嚴雲梯公雖頻年送讀而常使耕作惟三餘讀書所從之師未獲名宿弱冠後雲梯公捐館遂延先父蓮塘公從事家塾八股試帖均大有進步且爲人光明磊落好義輕財於父母妻三黨培植尤加厚焉先父見其知大節因命帆輿公聯爲秦晉交越二年先父蓮塘公卒公始從庾先生福農受業繼從游陳澍卿夫子門下十餘年苦心孤詣專事詩書毫不干預外事二先生見其讀書敦品均

以遠到相期巴湘兩邑有名之士一時爭與爲莫逆交嫺母梅孺人挑燈
佐讀篤修內政中年家號素封公益得肆力於學卽屢試不售而延師教
子每於課功之暇賓主互相琢磨講論文藝方謂大器晚成苦心人天不
負耳孰知天不假年賚志以沒今雖人往風微家道中落而繼起有人冢
君嶽年品學兼優克迪前志仲君菊生亦恪守彛訓文孫輩均森森竹立
器宇不凡使非公之厚德烏能食報於後人耶今值貴族重修譜牒帆不
揣謏陋謹就素所見公之實行特爲之傳以誌不忘云清奉政大夫巴邑
姻愚弟周春帆鞠躬謹撰

筠圃公傳

人生境遇何常始困終亨先順後逆皆氣數使然有不可強者也我族清
貢生筠圃先生性聰穎最好學聞有名宿不論遠邇卽負笈從遊其篤志
與蘇章無異應童軍試屢列前茅而終如羅隱不得一矜世所謂科名有

分定直其然乎先生達人也厄數奇遂決然捨去以篤修家政爲務孝友一堂人無間言雖家號素封抑抑然不挾富以驕人輕財好義鄉鄰戚族中遇有捐款罔不憊意以倡年荒歲歉有赤貧無聊者踵門告匱賙恤之邦助之無靳色亦無德色其待讀書寒士尤厚至於有無相通借貸難償者卽焚券已責饒有孟嘗君之遺風焉折節世務桑梓有鼠牙雀角必力爲勸解有難以言解者卽墊金以寢事古之仲連不是過也夫以先生之慷慨樂善如此宜又身履順而不至有逆也舉丈夫子三後先繼逝致使慟抱西河家業亦從而中落天之困阨善人固如是哉所可幸者蘭孫一曾孫一頭角崢嶸樸耕秀讀堪繩祖武先生之德未報於其身未報於其子終必報於其孫曾也前清光緒甲申四修譜牒公舉先生任局先生克盡其心不辭勞勩轉瞬五修彌興諸君同勸譜事細閱前屆經先生纂訂傳贊釐然秩然可爲後人法彌承先生愛重曾與彌言蓋官後爾可爲余

立傳否弼心許之今先生往矣蓋不忍聽其湮沒無聞矣茲值家乘告成
不揣謏陋特述先生之本末以昭示來茲而弼庶無負乃心耳太學生族
姪良弼謹撰

仲求公行述

公諱興瀚字仲求湘陰向氏兆騏外舅也自公歿後九年兆騏始與公女
渌生婚每歲時登堂從外家諸丈問公言行悠然深嚮往之思公先世開
封人南宋中始由江西轉遷湘陰曾大父敦堂大父岱峯父蔚青世列膠
庠敦行誼爲里中所推望公幼承庭訓克紹其業蔚青公學宗程朱冥心
尤在四子書公朝夕濡染于窮理盡性之要湛然有得所爲文雖幼時已
屈儕輩矣而家世貧甚簞瓢屢空小試科場得而復失遂藉課徒取資自
給嘗館于沅江鄒家窖敝廬爲一草舍僅堪容膝一夕風雨大作戶撼室
崩避榻下得免又屢以歲饑輟教生計益窘公不恥貧困而憂所學不能

援俗濟世益勵固窮之節會清季維新廢科舉興學校公知世變日亟非應時勵學無以自達而達人乃毅然負笈縣立師範學堂逾年復晉省習法政閱三載學成適民國肇造任漢壽縣司法委員櫛垢爬痒循聲卓著而廉正自守尤足以風勵末俗邑有帥許二姓者相仇成訟帥故豪族賄縣令殺許氏子案懸經年未決公至官帥復賂以金公據金根究得狀讞乃定雖豪強爲之緩頰勿顧也嗚呼世教衰微學者自束髮就傅時卽惟勢位富厚是計或平居潔身自矢一旦貨賄加前往往往欣然喜動顏色頓忘天壤間所謂羞恥事者比比然也公獨翹然自拔於俗跡其所爲雖古循吏暮夜卻金之行何以加焉時國體初草夙弊未除武人操政柄罔知紀綱公遇事持平不爲所屈漢壽權貴人謀欲擠之公曰吾不可以身之察察受物之汶汶也遂掛冠而去去之日邑中父老焚香走送途爲之塞有悲感至於流涕者漢壽民情詭譎自昔號難治而公去後之思乃如是

蓋其感召爲至深矣後復任醴陵地方法院檢察官瀏陽南縣會同汝城寶慶沅江各縣承審員先後十餘年持身以正御事以明訟平政理一如在漢壽時每訊獄必曲誘旁徵不遺瑣屑自日中至夜半無倦容或勸以少休公曰律意至公不可枉亦不可縱吾訊之詳尤必使人言之盡約而繹之參而稽之情僞始得豈可忽而自逸哉又曰昔人治獄常求其生吾雖不德未可以苟簡而使死者與我有恨也嗚呼儻所謂厚于仁者非耶公退居含宏淵默大讓無形遇事則仔肩艱鉅履險如夷司法會同時值滇軍入境湘軍戰敗知事彭公隨軍退辰谿邑中無主悍卒橫行閭里夜驚耆老推公攝縣政公撫輯周旋地方獲免糜爛事定告退曾無德容司法部參事湯君醴陵人也敬慕桑梓耳公清介多能欲推挽入京襄邵政公以親老未應而聲譽日隆慕義強仁者皆樂與交遊公遇人無所擇必皆盡其歡忻間歲家居雖村嫗有爭赴懇亦樂爲聽斷蓋其天性然也性

嗜酒暮年以飲致疾戊辰春由沅江卸篆返里就醫入秋疾大漸以七月二十日未時卒春秋五十有六元配胡夫人先公卒二十二年繼配羅夫人常隨任所後公十四年卒皆有淑德子四良杓胡夫人出湖南甲種商業學校畢業良檢業農良校私立廣益中學畢業良朴公葬後十八日殯女三長卽潒生次淮生梓生尙待字自良檢以下皆羅夫人出抑余又聞公之治家也和平樂易遇子姪無遽容而課績程功惟勤惟嚴必使無失教平居舉孝友儉約垂訓以身作則中年鶴俸所入家用漸饒布衣溫袍一如疇昔而堂上甘旨則必從豐兄弟五人析爨晚歲生齒日繁一庭之內怡怡肅肅內無諍語外無間言蓋正心修身厥學素裕誠于中形于外故以之治家則家齊以之治獄則獄理以之處窮約則恬淡自甘以之處富貴則清操彌勵傳曰君子素其位而行不願乎其外如公之學行大本早植斯能無入而不自得其流風餘韻後有知之者猶足以廉頑立懦

況于親災之者乎歲壬午向氏議修族乘良杓兄弟屬爲公立傳以章幽懿余不文竊恐蕪辭不足以闡潛德之清芬爰舉平日所接聞于諸丈者畧而次之昭茲來許獨以繫婚約于高門而未獲接公之言論風采是則余之私憾無已也中華民國三十一年壬午夏月子壻劉兆騏敬撰

博生公暨楊孺人行狀

族譜六修勝榮隨族長後贊襄局事日擊諸先進翰墨琳瑯爲前人立傳不禁潸然淚下耆久之勝榮幼未力學長不能文年來奔走風塵久荒筆墨又烏足以爲傳雖然爲子者豈可以拙於文而湮沒父母之潛德哉遂勉強操觚揭具行狀於下先考諱家學字琴清號博生爲王父和邦公之生子叔祖篤忠公之祧子也家素質有志於學曾祖筠圃公設教鄰近隨侍左右四年羸通文字自十三歲失怙衣食漸不給大母憫其丁零苦節守義和丸晝荻以教其成先考亦恪遵慈訓日出析薪日入勤學笞責備

至隱淚以受家尙節約饒有餘資遂購田畝新棟宇樹立業之基勝榮與弟勝華今日之所獲風雨攸除衣食攸裕皆先考血汗之賜也然明事理濟困乏急公益人咸敬仰之鄉里糾紛排解不息恆墊金以寢訟端民國肇建倡立學校振興教育創設義倉預備凶荒高祖蕉園公掛掃無資先考集合穀石自出其半獨理十年置祀田以垂永久至親逢主公嗣徙他鄉杳無音信先考將本房協吉公給其羨餘妥爲保管立已死之碑三十積累年之本息八十斛以待繼其宗祧私債貸人不追必償他如建涼亭修橋梁一切義舉慷慨解囊毫無吝色鄰有强悍嘗毀辱之先考恬然聽之或告之曰鄰某詈爾隨應之曰此妄人也又奚足較氣度有如此者髮配先妣楊孺人迺良玉公之次女也系出名門性貞靜嫻內則年十五來歸雖富家女白日灌園午夜紡織紅蓆度日後雖家裕猶親中饋事姑克盡孝道生女一富英適楊連生生子四長兄早殤四弟不祿惟勝榮與勝

華幸獲成人詎知天不假年因痼疾而歿逮今思之未嘗不慟恨孝養之
勿及也是時也榮方六歲華僅三歲衣裳賴大母起居飲食則先考是賴
且嘗教予曰家道小康書香勿墜命勝榮負笈他方從名儒遊次第升入
長沙廣益中學畢業後考入湖南軍校歲在己巳匪氛甚惡先考竟于五
月八日辰刻猝然被害勝榮聞耗奔喪喪葬稍爲盡禮由此一家無緒欲
出不能祇得困處家園躬盡烏私之養職卽地方綏靖手刃戴天之仇但
負送讀苦衷求學初志雖勝榮之不肖亦時勢促之然也至今思之欲表
楊父母之善行恐未能也亦聊以紀其行畧已爾男勝榮謹狀

傳狀類士淵公房內篇

節母朱孺人建坊文誥

清乾隆四年三月十一日湖南長沙府湘陰縣學生員向日紅同弟重長重敬呈爲青年勵節白完操懇請申詳以廣皇仁以敦閭化事竊維義士忠臣悉膺旌表孝子節婦均荷褒揚生母朱氏性本端嚴質原柔順調羹諳性孝承兩代慈姑對食齊眉敬協當年孟女焚青燈於五夜方佐讀以成名歌黃鵠於一朝願捐生而遂志心先死矣何知秋月春華身暫留兮惟念白頭黃口薄衾單枕愁當廿八之年素壁寒檠冷伴三雛之以母兼父斷機晝荻惟嚴以媳代兒生事死葬罔懈作未亡人五十四載絳霜續月兩眶血淚落無聲膺無窮壽八十一春集蓼茹荼千古心精明不滅何幸幽芳特採九重丹詔頒來頓令隱德彌彰一片貞心吐出伏懇師臺

詳請疏題庶窮嫠苦節不隨湘水沉淪而當道洪恩將並洞庭而浩蕩矣
呈由教諭劉家謨訓導雷榮聲以照得故生員向廷憲號則天之妻朱氏
十五合番廿八分鸞以婦代兒甘脆晨昏供二老爲師卽母辛勤刀尺課
三雛公論無間鄉鄰表揚當爲上請得邀旌典足勵正風加結送經縣憲
鄧鈺以照得節婦朱氏乃故生員向廷憲之妻心同白雪潔比秋霜織素
養親和丸教子節歷五十四載壽經八十一春三代書香隻身造就四朝
景運兩眼盈看所當重之旌典因以永其芳踪於乾隆四年六月二十八
日加結通詳長沙府憲馬金門湖南布政司張燦巡撫部院馮光裕提督
學院陳象樞湖廣總督部堂德沛核准咨經禮部於乾隆五年十二月初
三日彙題旌表本月初五日奉旨依議加恩旌表欽此旋於六年二月十
三日奉巡撫部院許溶布政司張燦飭由湘陰縣陳所抱在於本縣乾隆
五年地丁內給銀三十兩聽其本家自行建坊刻碑之處俱照定例遵行

仍將節孝姓氏刊入誌書查考邇卽建坊於本居郡家衝門前下首三月興工十月告竣孫郡庠生賢方見思氏邑庠生賢振九均氏監修工畢一堂四代盟手焚香頂祝謝恩永垂萬禩裔孫賢振九均甫謹識

節母黃孀人傳

嘗謂巾幗中烈婦難而節婦尤難蓋烈則決然一時節則守之畢世古今來詳書載誌誠以爲足勵風化也今嫂黃孀人係同邑青絲橋黃公萬安之女也年十八歸予房兄國疆字于萬公甫三載而疆抱疾孀人扶持寢食俱忘初冀其漸愈旣而病日增知不能起乃泣與疆言君病草矣儻數促妾不庸惜而君未有似妾心安忍疆密知矢志靡他爰告於父而父喜成厥志以二子國銘之次子泰典承嗣越數日而疆殞矣嗚呼合室吞聲頓傷離別之感族嬭垂唁戚增慟悼之悲而孀人哀戚踰常惻然罔覺由是觀之孀人之行謹志堅固決於夫歿之後諒早躊躇於夫疾之時厥後

清操勵節甘苦不辭事公姑孝而敬訓子姪慈寓嚴處妯娌和而諧凡一切家務罄無不宜時年臨六十奈力綿不能邀旌建坊以彰厥節猶幸孫支崛起承祧有人其所以報孺人者尙未有艾而孺人之志節苦心亦稍慰矣茲當續修家乘爰爲撰其大畧以付諸梓則孺人之守貞垂範與古之巾幗烈節者庶幾後先輝映與房夫弟國桂四香氏謹撰

徐孺人行述

先妣徐孺人清咸豐元年辛亥閏八月十三日未時生外祖考諱維鼎字仙圃居同里姚家冲以商起家外祖母氏李出自名門賢能並著無子僅生先妣視若掌珠外祖考善賈運粵產市湘眷屬隨寓省垣先妣仰承庭訓深嫻內則性慧敏幼時外祖母口授以女經女誡卽誦習不忘身體而力行之書算均無師導久而自通紡績鍼黹之事益精能殊絕年二十來嬪於我先考蔚青府君時上有重闈先妣奉事維謹深得堂上歡雖久習

城居不慣家鄉勞作然粹膺烹飪浣濯諸事固安行若素也未幾先大父與兄弟析居授徒所入不敷家用先妣常出外家私財以資補助及先曾大父先大父母相繼卽世府君復與先伯分居境益窘府君常館於外家事委之先妣先妣治家有法制用有經一歲之需準所入酌爲豫算不足則賴紡績針黹所得以補之有時手製冠履易錢恆得善價以勤儉故雖處困窘而現狀仍克維持又世業詩書門徒竇從往來頻數先妣殷勤接待誠敬有加庖厨之供百方措辦不以貧故而或缺廢往往藜藿不飽而魚臘儲以延賓歷數月而其味彌鮮固由中饋得宜亦其好禮之根於天性使然也府君生平好彰人善尤不惜瘡人之惡常言正氣伸則邪不能容直道而行絕無顧忌先妣輔以柔順佐以冲和委曲周旋彌縫助救用能諧和琴瑟白首猶新生女二早塲生不肖兄弟五乳哺提抱針紉補綴原已精疲力竭心瘁神傷中因先伯父母早逝又撫姪如己出其後先大

兄先二兄與不肖先後喪耦更連續撫孫而尤以先大兄之三子良枚乳哺未終祖孫卽相依爲命綜計五十餘年鮮有清靜逸居之日雖中經不肖與先二兄迎養於株州醴陵然逾年卽歸爲時甚慙耳家庭人口自鼎革以後日益增多子婦孫曾男女達四十餘口先妣防維內外紀律嚴明舉室翕然不聞詬諍諸婦諸孫婦雖多於工作則分配適宜於消費則待遇均等於子孫教育則絕不姑息以是一庭和順先妣棄養後五年依然團聚若非變亂分乘當不至於分析此皆先妣之令德有以感召於無形也其於敦睦之道講之尤夙親族中偶有嫌衅者多賴其解釋而消弭之戚族鄉里中無少長罔不以禮相接其度溫而肅其色婉而莊能使人見之自然起敬又秉性好善人有危難必盡力救助雖生計艱難自顧不暇然施濟之念未嘗不軫然於懷每見饑者必分食而予之飯寒者常搜篋而予之衣夙富醫藥常識遇有病者餽以平日所儲藥物輒奏奇效故鄰

里疾痛疴癢咸踵門求藥全活甚多曩昔婦女纏足相沿成習積重難回先妣於光緒中葉聞有人倡言放足卽首先發動打破積習以自身爲表率命諸婦孫婦踵承之更勸導戚族間次第解放其後由近而遠蔚爲風氣至反正時我鄉纏足之風已告絕矣人咸服先妣先見之明凡此皆極尋常事然實爲人所難能者宗族鄉黨間於其爲女時則皆曰賢女爲婦時則皆曰賢婦爲母時則皆曰賢母無間言焉初非不肖敢有溢美也以民國十七年寅歷戊辰十月二十日申時卒享年七十有八葬祔府君塋中華民國三十二年癸未秋月不肖男興滌曜昺泣述

王老太君行狀

蓋世不無賢母然爲吾母懿行特備者有所罕覩吾母王老太君僅六歲而嬪於向事文瀾吾府君家微也維時吾祖父之金陵外謀又叔祖伯父各自爲謀惟母與吾父奉吾祖母三人同爨多賴紡績自食其力雖終日

糟糠意泊如也祖母以其馴順而能苦甚愛之其後祖父歸父亦成立境漸回甘不數年祖母棄養母甚痛歎不得久事於姑專以奉舅然祖父氣象尊嚴凜然難犯尤能起敬起孝其日用之需均潔備前列膳食特烹以進無訖忙暇終歲爲之其相吾父也衣膳潔具久而能敬有事曲爲之解然必請所許男等或犯父顏不問是非惟厲則於子而後婉勸之而致吾兄弟也告誡訶斥重在讀書雖稠人廣坐不避外則不稍姑息內則實深愛之冀其進於德能成立也其於婦也亦然此外對叔舅父兄也均盡敬事之誠致師俸也米不精而代研又里戚有故問遺周詳未嘗稍忽其他鰥寡孤獨乞丐之窮尤恆周卹不吝而其敬待賓客下款傭工外園丰潔內奉蒞薄凡對於先人歲時祭祀常督健不忘此皆爲鄉隣耳目所見聞者至創業肯構婚嫁疾病內助多勞尤其餘事以上縷之皆吾母生平之細行也世有所難能者爰贅述之用示後昆可也男家夔謹狀